

ЎзКУФ Раёсатининг  
07.02.2017 йил 5-5-сон  
қарорига  
1-илова

**Ўзбекистон касаба уюшмалари Федерацияси  
гранти ва стипендияси учун танлов ўтказиш тўғрисида  
НИЗОМ**

Мазкур Низом:

республикамизнинг ижтимоий-иқтисодий тараққиётида илм-фаннинг ўрнини янада мустаҳкамлаш,

соҳада фаолият юритаётган катта илмий ходим-изланувчилар, талаба ёшларнинг фаолиятини ҳар томонлама қўллаб-қувватлаш, юқори малакали илмий кадрлар тайёрлаш сифатини оширишни рағбатлантириш,

илм-фан тараққиётида фундаментал тадқиқотлар муҳим аҳамият касб этиши,

фан, таълим ва ишлаб чиқариш интеграциясини янада такомиллаштириш муҳимлигидан келиб чиқиб,

Ўзбекистон касаба уюшмалари Федерациясининг (кейинги ўринларда “Федерация” деб юритилади) соҳада тадқиқотлар олиб бораётган катта илмий ходим-изланувчи ва мустақил изланувчиларга грант ва талабалар (магистрантлар)га стипендиялар тайинлаш ва тўлаш тартибини белгилайди.

**1. Мазкур Низомда қуйидаги асосий тушунчалардан фойдаланилади:**

**грант** – олий таълим муассасалари катта илмий ходим-изланувчилари ва мустақил изланувчиларига мазкур Низом билан белгиланган шартларда аниқ тадқиқотларни амалга ошириш учун ажратилган беғараз мақсадли пул маблағлари.

Федерация гранти меҳнат соҳасида халқаро ва миллий стандартлар, жумладан бандликни кафолатлаш, бирлашиш эркинлиги, меҳнат муҳофазаси, ижтимоий-иқтисодий муҳофаза, касаба уюшмалари фаолияти, жамоа музокаралари ва бошқа турдош йўналишларда илмий-амалий тадқиқотларни амалга оширувчи олий таълим муассасаларининг катта илмий ходим-изланувчи ва мустақил изланувчиларини рағбатлантириш мақсадида танлов асосида тақдим этилади;

**стипендия** – олий таълим муассасалари талабалари (магистрантлар)га Ўзбекистон Республикасининг қонун ҳужжатларида назарда тутилган бошқа тўловлардан қатъи назар, қўшимча тўланадиган ойлик пул таъминоти.

Стипендия чуқур касбий билимларни эгаллаш, мутахассисларни тайёрлаш сифатини янада ошириш учун зарур шароитлар барпо этиш, шунингдек меҳнат соҳасида халқаро ва миллий стандартлар, жумладан бандликни кафолатлаш, бирлашиш эркинлиги, меҳнат муҳофазаси, ижтимоий-иқтисодий муҳофаза, касаба уюшмалари фаолияти, жамоа музокаралари ва бошқа турдош йўналишларда илмий–амалий тадқиқотларни олиб бораётган ёки шу соҳага оид ижтимоий лойиҳа ишлаб чиққан талаба (магистрант)ларни рағбатлантириш мақсадида тўланади;

**тадқиқот** – мақсади ва амалга оширишининг аниқ муддатлари, маълум бир аҳоли қатлами манфаатига йўналтирилган, якунида эълон қилинган натижага олиб келувчи тадбир ёки комплекс тадбирлар;

**танлов комиссияси** – Федерация (тизим) мутахассислари ва Тошкент давлат юридик университети профессор-ўқитувчилари ва бошқа мутахассислардан таркиб топган махсус гуруҳ.

2. Танлов Федерация Кенгаши Раёсати томонидан тасдиқланадиган таркибдаги танлов комиссияси томонидан амалга оширилади.

Танлов комиссияси йиғилиши танлов учун камида иккита талабгор ҳужжатлари келиб тушган вақтда ўтказилади.

Танлов комиссияси йиғилиши мазкур Низомда белгиланган муддатларда ўтказилади. Эълон бўйича белгиланган муддатларда икки ва ундан ортиқ талабгорлардан ҳужжатлар келиб тушмаса, танлов комиссияси мавжуд (битта) таклифни кўриб чиқиши мумкин.

Танлов комиссияси хулосаси йиғилишда аъзоларнинг учдан икки қисми иштирок этганда ваколатли ҳисобланади.

Танлов комиссияси қарори иштирок этувчиларнинг тасдиқлаш ҳақидаги кўпчилик овози билан қабул қилинади ва баённома билан расмийлаштирилади.

3. Федерация стипендияси 2017-2018 ўқув йили учун магистратура ва бакалаврият талабаларини рағбатлантириш мақсадида белгиланади.

Стипендияларнинг ойлик фонди республикада ўрнатилган энг кам ойлик иш ҳақининг 5 (беш) баробаригача миқдорда белгиланади. Бунда стипендиянинг ойлик миқдори танлов комиссияси томонидан афзаллик берилган талабалар сонига нисбатан тақсимлаш орқали белгиланади.

Стипендия 2017-2018 ўқув йили (сентябрь-июнь ойлари) давомида ҳар ой кесимида тўлаб борилади.

Федерация гранти катта илмий ходим-изланувчи ва мустақил изланувчиларни рағбатлантириш учун белгиланади. Грант фонди тақдим этилган лойиҳанинг асосланганлик даражасига мувофиқ республикада ўрнатилган энг кам ойлик иш ҳақининг 45 (қирқ беш) баробаригача миқдорда белгиланади.

Федерация гранти танлов комиссияси тавсиясига кўра бир йўла тўланиши мумкин.

4. Федерация стипендияси олий таълим муассасалари (бакалаврият ва магистратура бўйича алоҳида) талабаларига Федерация томонидан ўтказиладиган танлов натижаларига биноан тайинланади.

Талабаларга Федерация стипендияларини тайинлаш учун қуйидаги мезонларни бажариш белгиланади:

Мазкур Низомнинг 1-бандида назарда тутилган йўналишларда илмий-тадқиқот (ижодий ишлар) ишларини олиб бориш;

мазкур йўналишлар бўйича конференция (танлов)ларда қатнашиш;

Федерация томонидан эълон қилинган тадбирларда фаол иштирок этиш.

Кундалик дарсларни ўзлаштирмайдиган, ўқув интизомини ва илмий одоб-ахлоқни бузган талабаларни ўқув йили мобайнида танлов комиссиясининг хулосасига биноан Федерация Кенгаши Раёсати қарори билан стипендиядан маҳрум қилиниши мумкин.

Федерация стипендияси учун талабгорлар томонидан қуйидаги ҳужжатлар тақдим этилади:

- таълим муассасасининг талабгор ҳақидаги маълумотномаси;
- талабгор олиб бораётган тадқиқотнинг (магистрлик диссертацияси ёки диплом иши) аннотацияси;  
Агар талаба танловда ижтимоий лойиҳа асосида қатнашаётган бўлса, унда белгиланган мавзудаги ижтимоий лойиҳанинг батафсил матни тақдим этилади (бунда лойиҳа мақсади, унинг ижтимоий аҳамияти ва амалий натижаларга йўналтирилганлиги ҳамда лойиҳани амалга ошириш механизмлари аниқ кўрсатилган бўлиши лозим);
- тадқиқот олиб борилаётган муассасанинг (кафедра, илмий-тадқиқот маркази) тавсияномаси (ижтимоий лойиҳа учун илмий раҳбар такризи);
- талабгорнинг шахсини тасдиқловчи ҳужжатлар;

- Федерация порталида ([www.kasaba.uz](http://www.kasaba.uz)) эълон қилинган бошқа ҳужжатлар.

5. Федерация гранти танлов комиссиясининг танлов асосидаги хулосасига мувофиқ тайинланади.

Бунда биринчи навбатда катта илмий ходим-изланувчилар тадқиқотлари, шунингдек қуйидаги мезонларга жавоб берувчи тадқиқотларга афзаллик берилади:

- тадқиқотнинг ижтимоий аҳамияти ва амалий натижаларга йўналтирилганлиги;
- тадқиқотнинг Федерация Устав фаолияти ва йўналишларига тўғри келиши;
- тадқиқотнинг долзарблиги, янгилиги ва инновационлиги, шунингдек тадқиқот натижаларидан ўқув жараёнида, ННТларнинг фаолияти, халқаро меҳнат стандартларининг миллий қонунчиликка имплементацияси ва Федерациянинг қонун ижодкорлиги соҳасида кенг фойдалана олишлиги;
- тадқиқот натижаларидан манфаатдор қатламнинг мавжудлиги;
- тадқиқотнинг долзарблигини кўрсатувчи халқаро ва миллий ташкилотларнинг ҳамда эксперт, мутахассисларнинг ёзма хулосаларининг мавжудлиги.

6. Федерация гранти учун талабгорлар томонидан қуйидаги ҳужжатлар тақдим этилади:

- таълим муассасасининг талабгор ҳақидаги маълумотномаси;
- тадқиқот олиб борилаётган муассасанинг (кафедра, илмий-тадқиқот маркази) тавсияномаси;
- талабгор олиб бораётган тадқиқотнинг аннотацияси;
- катта илмий ходим-изланувчи ёки мустақил изланувчилигини тасдиқловчи ҳужжатлар;
- талабгорнинг шахсини тасдиқловчи ҳужжатлар;
- Федерация порталида ([www.kasaba.uz](http://www.kasaba.uz)) эълон қилинган бошқа ҳужжатлар.

7. Танловда иштирок этиш учун талабгорларнинг ҳужжатлари Федерация томонидан тасдиқланган ва Федерация порталида ([www.kasaba.uz](http://www.kasaba.uz)) эълон қилинган муддатда топширилади.

8. Танловда иштирок этмоқчи бўлган талабгорлар ҳужжатлари Ўзбекистон қасаба уюшмалари Федерацияси ёки унинг ҳудудий бирлашмаларига топширилади.

Низомда талаб этилган рўйхат бўйича камчиликлар билан топширилган ҳужжатлар танлов комиссияси томонидан кўриб чиқилмайди.

Танловда иштирок этиш учун тақдим этилган ҳужжатлар қайтариб берилмайди, танлов комиссиясининг хулосаси қайта кўриб чиқилишига ва устидан шикоят қилинишига йўл қўйилмайди.

Талабгорларнинг ҳужжатлари танлов комиссияси томонидан кўриб чиқилади ва унинг натижалари Федерациянинг расмий веб-сайтида эълон қилинади.

Танловда ғолиб бўлган талабгорлар билан грант (стипендия) шартномаси тузилади.